

元史新編

元史卷五

本紀四上

世祖上

世祖皇帝諱忽必烈太祖之孫皇子拖雷第四子憲宗同母弟也以乙亥八月乙卯生及長仁明英睿思大有爲於天下歲辛亥憲宗卽位諸弟惟帝取長且賢故盡屬以軍國庶事南駐爪忽都之地卽金蓮川也於是徵姚樞於蘇門待以賓禮初太宗立軍儲所於新衛收山東河北丁糧後惟計直取銀帛帝請於憲宗築五倉於河上始令民入粟宋兵時侵南境帝請置經略司於汴以史天澤楊惟中趙璧爲使俾屯田唐鄧繕城以備宋兵壬子夏奉命征雲南癸丑受京兆分地遣將戍興元諸州又奏割河東解州鹽池以供軍立從宐府於京兆屯田鳳翔募民受鹽入粟

轉漕嘉陵更立京兆宣撫司以廉希憲楊惟中爲使徵許

衡爲京兆提學設交鈔提舉司印鈔以佐經用秋出師臨

洮次忒刺分三道以進帝由中道至滿陀城過大渡河經

行山谷二千餘里抵金沙江乘革囊以濟摩些蠻主迎降

在大理北冬師至白蠻打郭寨攻拔之不戮一人進次三

四百餘里甸白蠻送款軍薄大理城時大理主段智興微弱國事皆

決於高祥祥率眾遁去帝命大將野古追斬之分兵取附

都鄙闡烏爨等部進入吐蕃渠長峻火脫懼出降遂班師

甲寅冬至自大理入覲憲宗受命駐桓撫閒建城龍岡初

憲宗分漢地封宗屬而雅愛帝欲重之權命於汴京關中

自擇其一帝已得關中至是憲宗曰關中戶寡河南懷孟

地狹民夥可取以自益於是盡有關中河南之地會有讒

帝深得中土心者憲宗疑之命阿藍荅行省事於京兆劉
太平佐之鉤攷河南陝西諸路財賦置局關中大開告訐
帝用姚樞計盡遣妃主歸朝自見憲宗於六盤山相持各
泣下竟不令有所白而止遂罷鉤攷局而帝所置諸司亦
廢憲宗將分道伐宋命帝征鄂州戊午冬自龍岡啟行己
未秋次汝南戒諸將毋妄殺命楊惟中郝經宣撫江淮八
月入大勝關宋戍兵皆遁進次黃陂九月駐師江北宋相
賈似道統兵來援適親王莫哥遣使以憲宗凶問告且請
北歸繫人望帝曰吾奉命南征豈可無功遽還自登香鑪
山俯瞰大江江北曰武湖湖東爲陽邏堡其南岸卽澣黃
洲宋以大舟扼江渡軍容頗盛帝遣兵夜具舟遲明至江
岸風雨晦冥諸將皆謂未可渡帝不從令揚旗伐鼓進天

爲開霽與宋師接戰者三殺獲萬餘人逕達南岸屯兵圍鄂州似道懼密遣宋京如師願割江北地納幣請和帝不許攻益急俄聞先朝諸臣阿藍荅渾都海等謀立帝弟阿里不哥輒乘傳調兵去龍岡僅百餘里會似道再遣京至約歲奉銀絹各二十萬帝從郝經廉希憲議許之十一月軍北還輟耕錄云世皇軍次黃河苦乏舟夜夢老叟引至行河許間忽有人進曰此可渡也帝以物標識之乃覺明日循其人乃行大軍自後從之皆濟帝欲旌其功對曰富貴非所願但得自在足矣遂與五品印撥三百戶食之十二月帝駐燕京近郊縱新僉民兵人心大悅

中統元年庚申宋理宗景定元年也春三月戊辰朔日會車駕至龍岡新城親王合丹莫哥塔察爾等率東西二道宗王來會與諸大臣皆勸進辛卯帝卽位促鑄寶篆一治

而成眾皆慶賀夏四月戊戌朔初定官制以王文統爲中書省平章政事張文謙爲左丞辛丑以卽位詔天下曰朕惟祖宗肇造區宇奄有四方武功迭興文治多缺五十年於茲矣蓋時有先後事有緩急天下大業非一聖一朝所能兼備也先皇卽位之初風飛雷厲將大有爲憂國愛民之心雖切於己尊賢使能之道未得其人方董夔門之師遽遭鼎湖之泣豈期遺恨竟弗克終肆子冲人渡江之後蓋將深入焉乃聞國中重以僉軍之擾黎庶驚駭若不能一朝居者予爲此懼驛騎馳歸目前之急雖紓境外之兵未戢乃會羣議以集良圖不意宗盟輒先推戴左右萬里名王巨臣不召而至者有之不謀而同者皆是咸謂國家大統不可久曠神人重寄不可暫虛求之今日太祖嫡孫

之中先皇母弟之列以賢以長止予一人雖在征伐之間
每存仁愛之念博施濟眾實可爲天下主天道助順人謀
與賢祖訓傳國大典於是乎在孰敢不從朕峻辭固讓至
於再三祈懇益堅誓以死請於是俯徇輿情勉登大寶自
惟寡昧屬時多艱若涉淵冰罔知攸濟爰當臨御之始宜
新宏遠之規祖述變通正在今日務施實德不尚虛文於
戲麻數攸歸欽應上天之命勳親斯託敢忘烈祖之徽誕
告多方與民更始丁未以郝經爲國信使何源劉人傑副
之使宋議和且徵前約丙辰置急遞鋪僉鋪兵一晝夜行
四百里以速軍機乙丑徵諸道兵六千五百人入宿衛此
在內設立禁軍之始立互市於潁州漣水軍禁私商不得
越境犯者死阿里不哥僭號於和林五月戊辰朔建元中

統甲午以阿里不哥反赦天下詔頒新政一求直言一理
冤滯一均賦役一撫軍士一止貢獻乙未熒惑入南斗雷
五十餘日分漢地爲十路置宣撫司賽典赤李德輝燕京
路宋子貞益都濟南路史天澤河南路楊果北京路張德
輝平陽太原路劉肅真定路姚樞東平路張文謙大名彰
德路粘合南合西京路廉希憲京兆路皆宣撫使定戶籍
科差例分全科及減半科納絲輸鈔有差凡儒人及軍站
僧道等戶皆不與僉平陽京兆兩路兵七千人於延安守
隘此在外設立鎮戍軍之始徵諸路兵三萬衛京師六月
戊戌以李壇爲江淮大都督阿里不哥使劉太平霍魯懷
入京兆謀爲變廉希憲至捕誅之并誅乞帶不花於東川
明里火者於西川六盤守將渾都海起兵應阿里不哥反

秋七月癸酉以趙璧平章政事張啟元參知政事王鶚翰
林學士承旨史天澤兼江淮諸翼軍馬經略使丁丑設祖
宗神位於中書省遣官致祭用登歌樂初祭享之禮割牲
奠馬潼以蒙古巫祝致辭至是乃一變帝自將討阿里不
哥八月己酉立秦蜀行中書省以廉希憲爲右丞行省事
敕軍士所過毋擅撻辱官吏九月壬午初置拱衛儀仗及
祭器法服陝西行省丞相阿藍荅自和林起兵至西涼與
渾都海軍合丙戌命諸王合丹哈必赤率師敗之於姑臧
禽斬之西土平冬十月癸丑初行中統寶鈔自十文至二
貫文凡十等不限年月諸路通行賦稅竝聽收受十一月
戊子熒惑與填星順行太陰犯房發粟振盇都濟南濱棣
饑自是凡遇各路府州縣及諸王投下水旱荒饑輒發穀

鈔振耀十二月丙申帝至自和林乙巳以西僧八思巴爲
帝師授玉印統釋教是歲立太常寺玉宸院儀鳳司符寶
局御酒庫升龍岡新城爲開平府以吏戶禮爲左三部兵
刑工爲右三部各設尙書二員

二年辛酉宋理宗景定二年也春正月辛未夜東北赤氣
照人大如席庚寅李璫擅發兵修益都城塹二月丁酉太
陰掩昴丙午車駕幸開平詔減民間差發及軍站重科租
稅罷守隘軍三月壬戌朔日倉夏四月丙午聽儒士被俘
者贖爲民乙卯命十路宣撫官勸農桑抑游惰禮高年問
民疾苦舉茂才異等可從政者列名上聞其職官污濫及
民不孝弟者量輕重議罰是月躬祀天於桓州之西北灑
馬湏爲禮皇族之外無得與五月乙丑遣崔明道李全義

爲詳問官詣宋問國信使所在庚辰諭使臣經過官給餼廩軍士毋輒入民家丁亥弛諸路山澤禁私殺馬牛越境私販馬者罪死命史天澤爲中書右丞相河南軍民並聽節制置惠民藥局以姚樞爲太子太師竇默爲太子太傅許衡爲太子太保皆辭不拜六月癸巳諭各路宣聖廟有司歲時致祭諸儒月朔釋奠諸官員使臣軍馬毋得宿廟及聚飲理訟其中書院亦如例違者加罪丙申罷諸路拘收孛蘭奚括漏籍老幼等戶協濟編戶賦戊戌太陰犯角庚子定鹽酒稅法乙卯罷安邑貢蒲萄酒免衛輝懷孟賦稅償其所借芻粟庚申宋安撫劉整籍瀘州十五郡來降以整爲夔路安撫使升眞定鼓城縣爲晉州罷金銀銅鐵丹粉錫綠坑冶所役民夫及河南舞陽蘆戶藤花戶還

州縣出工局繡女懷孟提舉王允中引沁水鑿渠成溉田四百六十餘所賜名廣濟渠命耶律鑄爲左丞相秋七月辛酉朔立軍儲都轉運司癸亥立翰林國史院敕修遼金二史以史天澤耶律鑄爲監修官采訪遺事命宋降將王青製神臂弓柱子弓教武衛軍習射諭河南管軍官於近城地量存牧場餘聽民耕乙丑遣官持香帛祀嶽瀆海鎮及后土凡十有九處分五道每歲代祀自此始辛巳詔許衡卽其家教懷孟生徒己丑命鍊師王道歸於眞定築道觀賜名玉華自後每忌日享睿宗帝后御容於玉華宮卽此發諸道兵伐宋詔曰朕卽位之後深以戢兵爲念遣使於宋以通和好宋人不務遠圖伺我小隙反啟邊釁東剽西掠曾無寧日朕今春還宮諸大臣皆以舉兵南伐爲請

朕重以兩國生靈之故猶待信使還歸庶有悛心共成和議畱而不至者今又半載矣往來之禮遽絕侵擾之暴不已曲直之分灼然可見卿等當整爾士卒礪爾戈矛矯爾弓矢秋高馬肥水陸分道而進大興問罪之師尙賴宗廟社稷之靈其克有勳毋替朕命八月壬辰賜故金補闕李大節諡眞肅修撰魏璠諡靖肅戊戌以賽典赤平章政事許衡爲國子祭酒姚樞爲大司農竇默仍翰林侍講學士庚子立勸農司以陳邃崔斌等爲使壬寅頒斗斛權衡丙午太白犯歲星宋私商七十五人入宿州有司議寘法帝宥之聽樞場賈易九月庚申朔奉遷祖宗神主於聖安寺藏之瑞像殿戊辰徵儒人楊庸爲教授教孔顏孟三氏子孫王庸爲太常少卿教習大樂辛未置和糶所於開平丙

子諭諸王駙馬凡民間詞訟無得私自斷決田租輸沿河
近倉官爲轉漕毋勞民癸未改開元路隸北京免眞定官
民所貸官錢立諸路提舉學校官以王萬慶敬鉉等三十
人充之冬十月庚寅朔帝自將討阿里不哥諸王合丹塔
察爾從命平章趙璧尙書怯烈門各率蒙古漢軍駐燕京
近郊大行一帶東至平灤西控關陝修立堡寨壬寅命亳
州張柔歸德邸浹睢州王文翰水軍解誠張榮實東平嚴
忠嗣濟南張宏七萬戶及指揮使鄭江董文炳各率所部
兵詣行在十一月壬戌與阿里不哥遇於昔木土海子諸
王合丹塔察爾分兵奮擊大破之逐北五十里帝親率師
躡其後阿里不哥北遁庚午太陰犯昴癸酉命怯烈門趙
璧率諸軍從塔察爾北上分蒙古軍一出居庸關駐宣德

德興府一出古北口駐興州帝親將諸萬戶漢軍及武衛軍由檀順州駐潮河川以防之罷十路宣撫司止畱開元路十二月辛卯熒惑犯房壬辰犯鈞鈐甲午帝還師詔徹所在戍兵放民間新僉軍壬寅立異樣局達魯花赤掌御用織造立宮殿府專職營繕及御衣宮闈尙倉尙藥諸局設控鶴軍五百四人以軍使領之是歲天下戶百有四十一萬八千四百九十

三年壬戌宋理宗景定三年也春正月辛未禁諸道戍兵及勢家縱畜牧犯桑棗禾稼癸酉以軍興人民勞苦停公私逋負毋徵丙戌命備宮懸鐘磬樂舞箏翟用樂工三百六十二人二月丁亥朔定中外官俸己亥李璫反以漣海三城獻於宋遂入益都丙申郭守敬造寶山漏成徙至燕

京甲辰詔發兵討李瓊一會東平一會濱棣以諸王哈必赤總軍事己酉王文統坐與李瓊通謀伏誅詔諭天下壬子李瓊據濟南三月己未括木速蠻畏吾兒耶里可溫達失蠻等戶丁爲兵徙弘州錦工繡女於京師壬申命戶部尙書劉肅專理鈔法免北京西京絲銀稅夏四月丙戌朔大軍圍濟南辛卯修河中禹廟賜名建極宮甲辰太白晝見敕諸路管民官勸民開墾種植不得擅興不急之役妨奪農時乙卯詔軍民爲李瓊脅從者宥其罪命右丞相史天澤專征五月庚申築環城圍濟南禁軍行所在剽掠獨濱棣今歲田租之半東平十之三戊辰命大司農姚樞與尙書劉肅共商議中書省事六月乙酉朔割遼河以東隸開元路徙婆婆府屯田軍於鴨綠江西以防海壬寅陝西

行省言西京宣德大原匠軍困乏乞僉民往代帝曰軍籍已定豈宜更張可令貧富相資果甚貧者聽休息一歲秋七月戊午復蒙古軍站戶差賦農民包銀徵其半俘戶止令輸絲民當供賦之月無徵私債甲戌李璫就禽磔於市甲申夜有白氣亙天八月己丑郭守敬請開玉泉水以通漕運王允中請開邢洛二州漳滏澧河達泉以溉民田竝從之甲午以宣德州德興府銀冶付匠戶歲取銀及石綠丹粉輸官丙午立諸路醫學教授九月戊午以董文炳兼山東路經略使收集益都舊軍充武衛軍戍南邊壬戌改邢州爲順德府癸酉命阿朮爲征南都元帥治兵於汴閏月甲申朔免諸路軍戶他徭發粟三十萬振濟南冬十月丙寅分東西兩川都元帥府爲二賜高麗國王麻自是每

歲皆賜庚午敕總帥汪惟正將戍青居軍還屯田利州乙亥分立中書左右部以回紇人阿合馬領之仍兼諸路都轉運使專理財賦丁丑禁畿內田獵諭質子軍入侍十一月乙酉太白犯鉤鈴辛丑日有背氣重暈三珥作佛頂金輪會於聖安寺金錄周天醮於長春宮自是每歲間作遷河西民居應州官給牛種仍賜布人各二匹乙巳史天澤入見帝曰朕自知性不容物或乘怒欲有誅殺卿宜遲留俟覆奏方行戊申升撫州爲隆興府建行宮十二月甲寅封皇子眞金爲燕王守中書令丙辰立河南山東兩路統軍司自亳州至鈞州諸萬戶隸河南宿州至寧海州諸萬戶隸山東丁巳立十路宣慰司以總軍民立諸路轉運司掌權稅癸亥詔各路總管兼萬戶者止理民事勿預軍政

其州縣官兼千百戶者仍其舊諸路管民總管子弟有分管州府司縣及鷹房人匠諸務者悉罷之戊寅升大原臨泉縣爲臨州是月卽中書省奉祀祖宗神位備三獻官大禮使司徒攝祀事禮畢神主復藏瑞像殿

四年癸亥宋理宗景定四年也春正月丙戌改諸路監榷課稅所及清滄深鹽提領所爲轉運司甲午立十路奧魯總管府癸卯從阿合馬請興河南鐵冶設巡禁私鹽軍以廉希憲爲中書平章政事姚樞爲左丞商挺參知政事乙巳諭諸路漢軍奧魯毋隸各萬戶管領其科徵差稅山東河南隸統軍司東西兩川隸征東元帥府陝西隸行戶部辛亥放濟南所俘民文面爲奴者歸元籍二月壬子朔詔諸路官員子弟入質車駕幸開平發各衛軍千五百人扈

從諸衛漢軍萬五千人駐山後蒙古軍三千人駐官山防守歲如制甲子以王德素充國信使致書於宋詰其稽留郝經之故括民間兵器匿者死三月己亥定諸路包銀準輸鈔其絲料入本色非產絲之地亦聽折鈔癸卯初作太廟於燕京夏四月以太祖所行事蹟付史館五月乙酉初立樞密院以皇子燕王兼判院事戊子升開平爲上都辛卯立平準庫以均物價通鈔法庚子升開平望雲縣爲雲州松山縣爲松州從阿合馬請以歲入鐵鑄農具令民易粟輸官六月癸酉建帝堯廟於平陽給酒掃戶田五十頃命線眞爲右丞相塔察爾爲左丞相秋七月癸未禁諸投下毋擅勾攝燕京路州縣官吏諸路探馬赤毋擾民蒙古軍不得以民田爲牧地戊戌弛沿邊軍器禁置椎場於樊

城與宋通互市八月戊申朔置元帥府於大理升宣德州
爲府隸上都以淄萊登三州爲總管府治淄川命昔撒昔
總制鬼國大理兩路兵部郎中劉芳使大理至吐蕃遇害
詔恤其家戊午以阿脫商挺行樞密院於成都順慶潼川
元帥府竝聽節制甲子以西涼經兵振之鈔仍免租賦三
年諭諸臣傳旨有疑者許覆奏壬申車駕至自上都九月
乙酉立漕運河渠司禁民間所市布帛疏薄狹短者冬十
二月丁未朔令益都元帥欽察統鳳翔青居平陽軍戍虎
嘯寨甲戌徵耶里可溫達失蠻僧道等戶田租商稅是歲
天下戶百有五十七萬九千一百定民間絕戶財產竝拘
入官母寡子幼其母不得私鬻田宅放賤爲良富家子弟
父兄在者不得私借錢債典售家產人口違者斷迫入官

至元元年宋理宗景定五年也春正月丁丑朔高麗國王
王禎遣使來賀自是每正旦皆至敕諸路宣慰使非奉詔
無輒入覲諸王位下工匠已籍爲民者竝徵差賦癸卯築
冷水河城分兵戍之二月辛亥選儒士編修國史譯經書
起館舍給俸贍之壬子修瓊華島疏雙塔漕渠丁卯太陰
犯南斗癸酉車駕幸上都以西北諸王款附召諸路總管
赴上都大朝會夏四月戊申以彰德洛磁路引漳滏洹水
灌田致御河淺澀鹽運不通命塞分渠以復水勢辛亥太
陰犯軒轅御女戊午太白晝見五月乙亥遣郭守敬行視
西夏河渠庚辰敕劍州守將分軍守劍門關立寨人頭山
釋宋私商五十七人給糧遣歸丙戌太陰犯房己亥犯昴
以粘合南合平章政事秋七月甲戌彗星出鬼柳昏見西

北光燭天長數十丈貫上台掃紫微文昌北斗旦見東北
凡四十餘日癸未改新鳳州爲徽州以西番十八族部立
安西州丁酉龍門禹廟成庚子阿里不哥與親王玉龍蒼
失阿速帶昔里吉等及其謀臣不魯花阿里察脫忽思自
歸上都帝曰諸王皆太祖之裔釋不問惟誅不魯花等三
人八月壬寅朔乙巳立諸路行中書省以省官出領其事
軍國重務無不統攝詔頒新立條格定官吏員數分品從
等秩給俸祿授公田計日月以攷殿取禁擅用官物勿以
官物進獻勿借易官錢勿擅科差役凡軍馬不得停泊邨
坊詞訟不得隔越陳訴恤孤寡勸農桑驗旱澇平市價具
盜賊囚徒起數月申省部其諸王使臣驛傳稅賦差發不
得擅招民戶不得以銀與非投下人爲幹脫禁口傳敕旨

及追呼省臣官屬庚戌定諸站戶限田四頃免稅以供驛馬及祇應癸丑以劉秉忠拜太保參領中書省事始定都於燕改燕京爲中都分立省部其大興府仍舊丁巳改元大赦詔曰應天者惟以至誠拯民者惟以實惠朕以菲德獲承慶基內難未戢外兵未戢夫豈一日於今五年賴天地之畀矜暨祖宗之垂裕凡我同氣會於上都雖此日之小康敢朕心之少肆比者星芒示儆雨澤愆常皆闕政之所由顧斯民其何罪宣布維新之令溥施在宥之仁可大赦天下改中統五年爲至元元年戊午彗星伏甲子復見於參車駕至自上都自是二月臨幸八月始還元世諸帝率循無異皆不書冬十月庚戌有事於太廟奉安祖宗神主戊辰改武衛軍爲侍衛親軍分左右翼宋主昀殂太子

禩嗣改元咸淳十一月辛巳吉里迷國內附言東有骨鬼亦里于兩部歲來侵疆詔發兵征骨鬼壬辰罷領中書左右部并入中書省仍以阿合馬平章政事兼諸路都轉運使知大府監事十二月乙巳定中外官儀從甲子太陰犯房詔宋人新附及北人陷沒來歸者皆月給衣糧庚午罷各路奧魯官竝各投下達魯花赤始立州郡長吏遷轉法五品以上宣授六品以下敕授是歲招集析居放良還俗僧道編集人戶名怯憐口習諸色匠藝設總管府領之

二年乙丑宋度宗咸淳元年也春正月辛未朔日食癸酉徙鎮海百里八謙謙州諸色匠戶於中都給銀萬五千兩爲行費又徙奴懷忒木帶爾礮手人匠赴中都造船運糧乙酉籍河南北荒田分給蒙古軍耕種庚寅城西番匣答

路癸巳八東乞爾部刃西來朝貢銀鼠皮二月辛丑朔并
六部爲四以麥朮丁爲吏禮部尙書馬亨戶部尙書嚴忠
範兵刑部尙書別魯丁工部尙書禁山東諸路私煎硝磺
甲子定蒙古人充各路達魯花赤漢人充總管回鶻人充
同知永如制凡文案一同判行印信聽達魯花赤封識長
官收掌廉希憲商挺罷以寶合丁王晉代之論僧人通五
大部經者爲中選以有德業者爲州郡僧錄判正副都綱
等官仍於各路設三學講三禪會三月乙未罷南北互市
括民間南貨官給其直骨鬼襲擊吉里迷部兵帝命出粟
及弓甲給之免權上都商稅酒醋諸課夏閏五月癸卯升
椿縣爲景州罷淘金總管府聽民采辦丁卯定四親王南
京分地鄭州隸合丹鈞州隸明里睢州隸李羅赤蔡州隸

海都其他屬邑皆還朝廷命趙璧行省南京廉希憲行省東平姚樞行省西京詔各路州府戶不滿千者量加并省凡投下者各附所隸州城其散府州郡戶少者不更設錄事司及司候司附郭縣止聽州府官兼領自是裁并州縣凡二百二十餘所六月戊辰朔新得州土官向良內附令移戍通江徙山東統軍司於沂州丙子太陰犯心大星秋八月己卯諸省臣皆罷命安童爲右丞相伯顏爲左丞相阿朮帥師攻廬州安慶諸路宋將范勝張林高興孟興戰死九月戊戌將有事於太廟命滌養犧牲取大樂工於東平預習儀禮庚子皇孫鐵穆耳生冬十月己卯享太廟尊皇祖爲太祖追諡聖武皇帝皇祖妣爲光獻皇后癸未敕統軍萬戶麾下所俘人口官贖爲民其私越禁界被獲者

許親屬完聚詔貧難軍或兩戶三戶合出正軍一名其丁單有力者許募人應役十二月庚午改北京西夏二行省爲宣慰司己丑瀆山大玉海成置廣寒殿改諡皇考睿宗爲景襄皇帝上皇妣尊諡爲莊聖皇后升祔睿宗廟置宗王府札魯忽赤十員掌諸王駙馬投下蒙古色目人應犯一切公事及漢人姦盜等罪

三年丙寅宋度宗咸淳二年也春正月壬子立制國用司以阿合馬爲使張惠副之張易同知司事二月丙寅以廉希憲宋子貞平章政事張文謙爲左丞阿里爲右丞史天澤爲樞密副使甲申製太常禮樂工冠服復立東京廣寧懿州開元恤品合懶婆娑等路宣撫司參知政事王晉侍中和哲斯轉運使王明坐隱匿鹽課伏誅夏四月丁卯五

山珍御榻成置瓊華島廣寒殿庚午定歲祀嶽鎮海瀆之制五月丙午浚西夏中興漢延唐來等渠丙辰罷益都行省及息州安撫司六月丁卯封皇子南木合爲北平王戊寅申嚴陝西河南竹禁秋七月丙申以張德輝參議中書省事己未發西夏避亂民還本籍成都新民爲豪家所庇者勒歸州縣十一月辛卯詔給京府州司縣官吏俸及職田命忽都荅爾爲中書左丞相丙辰諭四川行院江漢庸蜀等效順其官吏對階改授有功者遷有才者用民無生業者振衣糧願遷內地者給田廬毋令失所十二月辛酉改四川行院爲中書省立諸路洞冶所聽制國用司節制丁亥建大安閣於上都鑿金口導盧溝水轉漕西山木石命張柔段天祐同行工部事築宮城立提點宮城所

四年丁卯宋度宗咸淳三年也春正月癸卯修曲阜宣聖廟乙巳百濟遣使來朝禁僧官侵理民訟辛亥以趙璧爲樞密副使許衡謝病還懷孟癸丑封昔木土山爲武定山其神曰武定公泉爲靈淵其神曰靈淵侯以駕討阿里不哥駐此之故僉蒙古軍戶二三丁者一人四五丁者二人

六七丁者三人爲軍戊午析上都隆興府自爲一路三月己丑耶律鑄復爲左丞相

是年置丞相五員

辛卯自潼關至蘄縣

立河渡官八員譏察姦僞乙未建習樂堂於中都使樂工肄業壬寅從安童言止設丞相二員蒙古漢人參用外用老成一二員同議省事丁巳耶律鑄置宮縣樂成賜名大

成樂夏四月甲子新築宮城於中都東北方六十里爲門

十二

初金人滅宋移汴京艮嶽石於燕京壘成萬壽山元築宮城山適在大內西北太液池之陽名曰瓊華島

五月丁亥朔日會新建孔子廟於上都丙申威州山後大
番弄麻等十一族來附壬子增諸路包銀一兩充官俸六
月乙丑史天澤復爲左丞相忽都荅爾耶律鑄並降平章
政事伯顏降右丞廉希憲降左丞阿里張文謙並降參知
政事詔亦卽納新附貧民從人借貸者官爲代償秋八月
庚申填星犯天罈丙寅以宣徽院掌供玉會宴享及孳畜
芻菽等事用人得自選不由中書壬午太白犯軒轅大星
九月壬辰作玉殿於廣寒殿中乙未敕汪良臣立寨於母
章德山控扼江南以當釣魚山之衝戊申復召許衡爲祭
酒庚戌封皇子忽哥赤爲雲南王往鎮大理帝曰朕固樂
其風土曩非麻數在躬當於彼分器焉乃析其國三十六
部爲三路冬十月壬戌魚通潯州番部入附以渠長阿奴

版的哥爲喝吾等處總管改給鐵旗城後番官璽書符命
甲子歲星犯軒轅大星庚辰定官員廕敘格十一月乙酉
享太廟宮縣登歌樂文武二舞咸備戊戌立新蔡蓋津二
縣甲辰立夔府路總帥府戌開州乙巳填星犯天罇距星
十二月己卯省平陽路岳陽和川二縣入冀氏安西路櫟
陽縣入臨潼立諸位幹脫總管府

五年戊辰宋度宗咸淳四年也春正月甲午太陰犯井閏
月戊午令益都漏籍戶四千淘金棲霞縣每戶歲輸金四
錢二月戊子太陰犯天關己丑犯井三月丙寅免諸路四
品以下官子孫入質壬申改母章德山爲定遠城武羣山
爲武勝軍丁丑罷諸路女真契丹漢人爲達魯花赤者夏
五月辛亥朔以太醫院拱衛司教坊司及尙倉尙果尙醢

三局隸宣徽院秋七月癸丑初立御史臺命右丞相塔察爾爲御史大夫帖只爲御史中丞帝曰臺官職在直言朕或有未當其極言無隱毋憚他人朕當爾主戊辰罷諸路打捕鷹房工匠洞冶總管府並聽轉運司兼領遣忙古帶率兵征建都蠻九月癸丑罷中都路和雇所立京師瀕河十倉丁已阿朮統兵圍樊城冬十月戊寅朔日食己卯敕中書省樞密院凡事與御史臺同奏初設起居注以翰林官兼充十二月戊寅敕二分二至及聖誕節祭星於司天台復置乾州奉天縣以好時永壽二縣省入是歲帝擊叛王海都於北庭追至阿力麻里之地去上都萬餘里海都遠遁帝令勿追

六年己巳宋度宗咸淳五年也春正月癸丑立四道提刑

按察使司設副使僉事巡行各道曰山東東西道河東陝西道山北東西道河北河南道任滿聽御史臺攷核戊午命史天澤董師襄陽二月己丑頒蒙古新字詔曰國家肇基朔方制用文字皆取漢楷及畏吾字以達本朝之言攷諸遼金及遐方諸國例各有字今文字寢興字書方缺特命國師八思巴勅蒙古新字頒行諸路譯寫一切文書期於順言達意而止凡璽書頒降俱用新字仍各以其國字副之丁酉敕宮燭毋彩繪鞍韉箭鏃不得以黃金爲飾夏四月辛巳製玉璽大小十紐放單丁貧乏爲民禁戍卒毋踐屯田禾稼以眞定等路蝗免代輸築城夫戶賦癸卯命董文炳率兵南征秋七月辛酉製太常寺祭服己巳立諸路蒙古字學設教授命職官子弟每路二人府州各一人

民間子弟上路三十人下路二十五人充生徒凡省院臺部並用識蒙古字人員作必闕赤譯寫文移立西蜀四川監榷茶場司八月己卯立金州招討司丙申命中書省采輯農桑事定列條目令按察使與州縣官相風土所宜頒行九月詔諭淮蜀官民曰朕纂承丕基同仁一視罔間南北兩淮四川大江以南皆吾赤子卽位之始未遑他務首遣國信使副講信修睦以通和好惟期投戈卷甲使兩地百姓息肩咸遂安生樂業之願豈意宋人妄生邊釁是驅若國生靈置之鋒鏑而不恤也恐有無辜枉被殘擾今詔諭彼界官吏軍民人等及我國人或因小過逋亡或勢不獲己因而陷沒者當明知朕不欲用兵之本意爾等卽轉禍爲福其審圖之戊午定民間貸錢雖踰限止償一本息

冬十月己卯定朝儀服色壬午升高唐冠氏竝爲州庚子
太陰犯辰星遣官慮囚赦諸路鰥寡廢疾官給廬舍薪米
後皆不書十二月戊子築東安渾河堤己丑時享畢命國
師作佛事於太廟七晝夜造木質金表牌位十六設大榻
金椅奉安祏室前此太廟薦佛事之始析彰德懷孟衛輝
爲三路升林慮縣爲林州改潁州爲韓城縣并省馮翊等
州縣十所始置義倉

七年庚午宋度宗咸淳六年也春正月丙午耶律鑄廉希
憲罷立尙書省罷制國用使司以忽都荅爾爲中書左丞
相許衡爲左丞阿合馬平章尙書省事張易副之張惠李
堯咨麥朮丁竝參知尙書省事己酉太陰犯畢赦諸投下

官隸中書省

初制以中書省統山東西北地大都燕京
皆隸焉謂之都省至是以諸王駙馬投下官

并錄二月辛未朔以伯顏爲樞密副使甲戌築昭應宮於

高粱河丙子帝御行宮觀劉秉忠許衡及太常卿徐世隆所起朝儀大悅舉酒賜之下丑以歲饑罷築宮城壬辰立司農司以張文謙爲卿設四道巡行勸農官三月庚子朔日會改諸路行中書省爲行尚書省丙辰浚武清縣御河夏四月壬午檀州隕黑霜二夕五月甲辰威州汝鳳川番族渠長來朝以合荅平章政事丙辰免上都商稅惟市易莊宅奴婢孳畜例收契費六月庚辰敕戍軍還沿途立安樂堂饑者食之病者醫之死者槩葬官給其直丙申立籍田於中都東南郊秋七月辛丑設上林署乙丑以遼東開元總管府兼本路轉運司事八月戊辰朔阿朮築環城以逼襄陽戊寅以塔察爾同知樞密院事帖只爲御史大夫

辛巳置應昌府設官屬九月庚子汰僧道耶里可溫有家
室者爲民丁巳太陰犯井丙寅括河西戶口定田稅冬十
月庚午太白犯右執法癸酉定宗廟祝文書以蒙古字牲
牢用野豕時果勿市取之內園降興中府爲州十一月壬
寅熒惑犯太微西垣上將立侍儀司掌朝會諸儀史天澤
築萬山爲一字城自是襄樊道絕閏月丁卯朔禁緇段織
日月龍虎及以龍犀飾馬鞍者壬辰立諸站都統領司總
驛傳仍設脫脫禾孫盤詰往來奸僞十二月丙申朔改立
大司農司增巡行勸農使副各四員命御史中丞孛羅兼
大司農卿以都水監隸之定歲祀制每春秋二仲月上戊
日祭大社大稷於西南郊立春後丑日祭風師於東北郊
立夏後申日祭雨師雷師於西南郊壬寅降河南韶州爲

澠池縣丁未金齒驃國三部長內附獻馴象三辛酉建大
護國仁王寺於高良河更定僧尼服色是歲東京路旱南
京河南等路蝗免絲銀十之三振山東淄萊路饑者再
八年辛未宋度宗咸淳七年也春正月丙寅太陰犯畢己
卯諭南陽屯田人戶皆內地中產之民遠徙失業各仍還
本籍南京諸郡民賦悉改輸米粟貯近地給襄陽軍遣兀
都蠻帥師鎮西方旦當發近畿民二萬八千人築宮城二
月乙未朔定官民婚聘禮數己亥罷諸路轉運司入總管
府移陝蜀行省於興元癸卯以趙璧爲中書右丞乙巳大
理宣慰寶合丁王傅闊闊帶毒般雲南王忽哥赤事覺伏
誅戊申以治事日程諭中外官吏己未敕軍官佩金銀符
其民官工匠所佩者竝拘入勿復給辛酉分歸德爲散府

升中州爲南陽府濟州爲濟寧府三月乙丑增置河東山西道提刑按察司改河東陝西道爲陝西四川道山北東西道爲山北道東道辛巳復立夏邑縣以碭山并入省穀熟縣入睢陽乙酉許衡以老病乞解機務除集賢大學士兼祭酒如故設蒙古國子學選蒙古漢人官員子孫及俊秀者充生徒好學者兼習算法丁亥熒惑犯太微西垣上將己丑敕有司毋滯獄以致越訴封皇子燕王乳母趙氏幽國夫人夫鞏德祿追封德育公夏四月戊午阿朮與宋將范文虎戰於湍灘敗之五月乙丑以東道兵方圍襄陽分命秦蜀諸將各進兵鄭鼎出嘉定汪良臣出重慶札刺不花出瀘州曲立吉思出汝州以牽制宋師所至順流縱棧獲宋戰艦甚眾丙寅牢魚國來貢己卯命史天澤平章

軍國重事六月甲午諭樞密院凡軍情徑奏不由尙書省
有事關錢糧者仍與共議管民官所領錢穀竝俟年終攷
較乙卯招集河西幹端昂吉阿等處居民秋七月壬戌朔
設回回司天臺官屬丁卯命國王頭輦哥行省北京有訴
運山侍郎張大悅與宋交通者帝諭之曰宋人善用間計
朕不輕信毋懷疑懼辛未置左右中三衛親軍都指揮使
司掌宿衛扈從兼屯田事八月壬辰朔日倉己未聖誕節
始立內外仗及雲和署樂位東川統軍司攻拔銅鈹寨宋
總管李慶降以慶知梁山軍九月丙寅罷陝西五路西蜀
四川行省以耶速荅爾行四川省事於興元京兆等路直
隸尙書省戊辰升成都德陽縣爲德州降虢州爲虢略縣
丙子太陰犯畢敕今歲享太廟毋用犧牛癸未弛四川茶

鹽禁帝曰四川民力困敝自今有言茶鹽之利者以違制
論冬十一月辛酉朔建國號大元詔曰誕膺景命奄有四
海必有美名以紹紀統唐之爲言蕩也虞之爲言樂也馴
至禹興而湯造互名夏大以殷中世降以還事殊非古爲
秦爲漢者止從初起之地名曰隋曰唐者僅乃始封之爵
邑是皆徇百姓見聞之狃習要一時經制之權宜我太祖
起朔土膺帝圖方輿之廣歷古所無旣成大業宜定鴻名
取易乾元之義可建國號曰大元十二月辛卯朔宣徽院
請以闡遺漏籍等戶淘金帝曰姑止毋重苦吾民也乙巳
立新字學士於國史院掌翻譯文字省太常寺入翰林院
宮殿府入少府監

九年壬申宋度宗咸淳八年也春正月甲子罷尙書省入

中書省以阿合馬張易竝平章政事張惠爲左丞李堯咨
麥朮丁竝參知政事罷給事中中書舍人檢正等官仍設
左右司丁丑命西平王奧魯赤領忙古帶十八族欲速公
弄等吐蕃軍同征建都蠻降新安州爲縣隸順天改諸路
行尙書省仍爲行中書省分立京兆行省壬午改山東東
路統軍司爲行樞密院移鳳州屯田於鹽白二州二月辛
卯詔札魯忽赤乃太祖開國所制位列百司上其賜銀印
立左右司自後多稱耶可札魯忽赤改中書爲大都戊申始祭先農於
東郊如祭社儀三月甲戌焚比間四教經免醫戶差徭阿
朮破樊城外郭夏五月戊午朔立和林轉運司兼提舉交
鈔癸亥遣拔都軍於怯鹿難之地開渠耕田罷西番圖魯
干諸處金銀礦戶爲民乙酉太白犯畢距星建宮城東西

華左右掖門六月壬辰減乞里吉思屯田租宋師救襄陽

阿朮敗之龍尾洲宋統制張順張貴死之京師大雨壞牆

屋壓死者眾禁私鬻回回麻秋八月丙戌朔日倉戊子立

羣牧所掌天閑及尙方鞍勒九月丙寅括諸路正軍貼戶

及同籍親戚奴僕丁年既長依權要避役者竝還爲軍戊

寅太陰犯御女冬十月丙戌朔封皇子芒兀刺爲安西王

賜京兆分地駐兵六盤山遣使持詔諭扮卜忻都國戊戌

以趙璧平章政事張易爲樞密副使熒惑犯填星己亥定

每歲自七月至十一月終聽捕獵餘月有禁癸卯立會同

館以居降人及番洞官之來朝貢者

百官志稱至元十三年始置今據紀文載

此十一月壬戌諸王只必帖木爾築新城成賜名永昌府

丁卯太陰犯畢己卯并中書省左右司爲一回回獻巨石

礮命送襄陽軍前十二月乙酉朔宋將咎萬壽攻成都僉省嚴忠範戰失利逮至京

十年癸酉宋度宗咸淳九年也春正月戊午立京師醫學名廣惠司癸亥阿里海牙取樊城宋將張漢英范天順牛富死之丁卯立祕書監掌歷代圖籍并陰陽禁書選世家名臣子弟爲監丞己卯置軍器永盈二庫分典弓矢甲冑遣使持金十萬兩市藥師子國二月丙申雲南羅羽渠長阿旭叛敕有司安集其民丁未宋安撫呂文煥以襄陽降召赴闕其熟券軍畱襄陽屯田生券軍分隸各萬戶翼三月丙寅帝御廣寒殿授皇后弘吉刺氏玉冊玉寶授皇太子眞金玉冊金寶詔告天下壬申分金齒國爲兩路癸酉客星青白如粉絮起畢度五車北復自文昌貫斗杓歷梗

河至左攝提凡二十一日命耶律鑄平章軍國重事張憲
爲右丞夏四月癸未朔呂文煥入朝授侍衛親軍都指揮
使襄漢大都督罷中興河南兩路行省命史天澤阿朮阿
里海牙行荆湖樞密院事鎮襄陽合荅劉整塔出董文炳
行淮西樞密院事守正陽爲滅宋計丁酉敕南儒被人略
賣者官贖爲民辛丑罷四川行省入西川行院別置東川
行院於重慶五月壬子朔詔天下獄囚除殺人者待報其
餘槩行疏放限八月內如期自至大都六月丁亥免大都
南京兩路賦役以紓民力汰陝西貧難軍甲午改資用庫
爲利用監閏月己巳罷東西兩川統軍司秋七月辛巳許
衡乞罷丙戌敕襄陽生券軍無妻子者赴京老疾者遣還
家庚寅省西涼府入永昌路是月霖雨享祭山川嶽鎮海

瀆社稷宗廟八月庚戌朔高麗遣使賀聖誕節後每歲皆
至不書赦諸路罪囚自至大都就獄者二十二入九月辛
巳以合伯平章政事甲申生券軍至大都詔釋其械俾從
征日本人各賜鈔娶妻丙戌以王恂主國學增置生員設
東宮宮師府詹事以次官屬己丑敕自今秋獵鹿豕先薦
太廟冬十月庚申命合荅帶爲御史大夫出御史臺贓罰
鈔振貧民升襄陽府爲路初建正殿寢殿香閣周廡兩翼
室皇子奧魯赤改建都禽其長下濟等四人建都降立靈
遠都護府大司農言畿內秋禾始收請禁民覆耕恐妨芻
牧帝以農事有益不許十二月己酉朔省陝州虢略朱陽
二縣入靈寶罷西夏世官是歲諸路蟲蝻災霖雨害稼振
米凡五十四萬五千五百九十石免民代輸僉軍絲銀及

伐木夫戶稅息前朝官錢毋徵

十一年甲戌宋度宗咸淳十年也春正月己卯朔宮闕告成帝始御正殿受朝賀庚寅初立軍官以功升散官格自龍虎上將軍以下至進義副尉凡三十四階丙午免于闕采玉工差役阿里海牙阿朮入覲力言江南可下宋室可平帝命史天澤伯顏專征僉軍十萬人益之二月戊申朔立儀鸞局掌宮門管鑰供帳鐙燭甲寅太陰犯井壬申起廉希憲爲北京行省右丞三月庚寅移四川礪門兵戍哈荅城辛卯改荆湖淮西二行院爲行省伯顏史天澤竝爲左丞相阿朮平章政事阿里海牙爲右丞呂文煥參知政事行省荆湖合荅爲左丞相劉整爲左丞塔出董文炳參知政事行省淮西癸巳改金州招討司爲萬戶府遣使招

諭八魯國夏四月辛亥分陝西隴右諸州置提刑按察司
治鞏昌癸丑初建東宮辛未詔安諭幹端鴉兒看合失合
兒等城諭丞相合答先守沿江堡隘爲使傳往來之衛仍
分兵掠荆南鴉山以綴宋之西兵六月庚申聲罪伐宋詔
統軍官曰爰自太祖以來彼宋與我使介交通殆非一日
彼此曲直之情亦所共知不必歷舉迨我憲宗御世朕以
藩服奉命南伐師次鄂渚彼賈似道再遣宋京詣軍前請
罷兵息民願奉歲幣朕以國之大事宗親在上必須入計
用報而還卽位之始追憶是言乃命郝經等持書往聘蓋
爲生靈計也古者兵交使在其間惟和與戰宐嗣報音其
何與於使哉而乃執之卒不復命羈此一介行李於彼何
益於此何損以致師出連年邊境之間死傷相藉繫累相

屬皆宋自禍其民耳襄陽被圍五年旅拒王師義當不貸
朕先有成命果能出降許以不死是以既降之後朕不食
言悉全其命冀宋悔過或啟合圖而乃執迷罔有悛心此
問罪之師有不能已者夫以天下爲念爰及干戈自古有
之無辜之民初無與焉若彼界官民有能去逆效順與眾
來降或別立功績者驗等第官資遷賞所附軍民爾等宜
嚴敕將士毋得妄行殺掠仍加振給令得存濟其或負固
弗從及抗拒迎敵者俘戮何疑甲子分遣忙古帶帥武衛
軍南征秋七月乙未伯顏陛辭帝曰古之善取江南者惟
曹彬一人汝能不殺是吾曹彬也宋主禛崩太子焜嗣改
元德祐八月丁未從史天澤言以荆湖淮西各置行省事
權難一復改淮西行省爲行樞密院天澤至中途有疾而

還詔太原新僉軍遠成兩川遣使分括廩粟給其家九月
癸巳軍次鹽山距郢州二十里宋兵當郢夾漢城萬勝堡
南岸戰艦千艘鐵絙橫江遏我舟師不得下惟黃家灣有
溪經鶴子山入唐港可達江宋又築壩置堡其處駐兵固
守伯顏督諸軍攻拔其堡鑿壩挽舟入溪出唐港整列而
進冬十月壬戌歲星犯壘壁陣乙丑伯顏督諸將破沙洋
堡進次新城宋統制黃順縋城降都統邊居諒自焚死趙
文義戰死十一月乙酉師次復州宋安撫翟貴降癸巳東
川元帥楊文安拔宋雲安羅拱高陽城堡壬寅起閣南直
大殿及東西殿增選樂工八百隸教坊十二月丙午軍次
漢宋軍守陽邏堡以掘中流伯顏用千戶馬福計自漢口
開壩引船會淪河趨沙蕪徑入大江乙卯阿里海牙進軍

青山磯破武磯堡己未伯顏次鄂州宋權守張晏然都統
程鵬飛知漢陽軍王儀知德安府來興國竝以城降伯顏
畱阿里海牙鎮鄂州規取荆湖而自與阿朮將諸軍水陸
東下癸亥增置歸德永城縣省長武縣入涇川夏原縣入
靈臺是歲諸路好蚘等蟲災振米粟凡十二萬餘石天下
戶一百九十六萬七千八百九十

十二年乙亥宋主熈德祐元年也春正月甲戌師次黃州
宋制置陳奕及其子知安東州巖皆以州降乙亥東川副
元帥張德潤拔禮義城宋安撫張資死之癸未師次蘄州
宋安撫管景模獻城丙戌次江州宋知江州錢真孫呂師
夔知南康軍葉闔六安軍曹明竝迎降己丑選蒙古漢人
有才者赴軍前爲新附州郡民官乙未遣尙書廉希賢侍

郎嚴忠範祕書監柴紫芝至宋己亥置雲南郡縣長及規
措所二月癸卯師次安慶宋知府事范文虎出降甲辰命
博魯歡爲淮南都元帥會各部兵於邳州丙午伯顏師次
池州宋統制張林以城降權州事趙昴發死之丁未禁無
籍自效軍俘掠新附軍民戊申詔諭江黃鄂岳漢陽安慶
諸處歸附士民軍匠僧道人等令農者就耒商者就途士
庶緇黃各安己業如鎮守官吏妄有騷擾許詣行省陳告
庚申召降臣張晏然赴闕帝曰朕省卿奏云宋之權臣不
踐舊約拘畱使者實非宋主之罪儻蒙聖慈止罪擅命之
臣庶令趙氏有祀卿言良是卿旣不忘舊主必能輔弼我
朝比令伯顏按兵不動仍遣廉希賢等持書往使果能悔
過來附旣往之愆朕復何究卽權臣賈似道尙不欲加罪

況肯令趙氏乏祀乎若其執迷罔悛未然之事朕將何言
天其鑒之辛酉師次丁家洲宋相賈似道親督步帥孫虎
臣淮西制置夏貴操戰艦橫互江中伯顏分步騎夾岸而
進舉巨礮擊之宋兵大潰似道走揚州甲子師次蕪湖宋
知無爲軍劉權知大平州孟之縉降博魯歡軍下邳宋西
海州安撫丁順降乙丑阿里海牙取江陵下岳州宋統制
孟之紹舉城降戊辰師次采石宋知和州王善宋史降博
魯歡次漣水宋知安東州孫嗣武降庚午師次建康宋都
統徐王榮翁福茅世雄曹旺俱以城降賈似道至揚州始
送郝經劉人傑歸國命北平王南木合出鎮阿力麻里之
地丞相安童行省院事往輔之以防海都三月壬申朔宋
鎮江統制石祖忠江陰軍僉判李世修相繼納款乙亥分

兵徇饒州宋知州唐震故相江萬里死之敕安西王芒兀
刺分軍從西平王奧魯赤征吐蕃丙子廉希賢等至建康
傳旨令諸將各守營壘無妄侵掠己卯升平陰縣新鎮寨
爲肥城縣庚辰宋知寧國府顏紹卿知滁州王文虎以城
降江東平得府二州五軍二縣四十三甲申置懷遠靈武
二縣於中興路分處新民丙戌師至常州宋鈐轄戴之泰
通判王虎臣以城降廉希賢等至獨松關爲宋人所殺丙
申四川側布番官稅昔確州番官莊寮等率四十三族詣
行院款附庚子分置翰林院專掌蒙古文字其翰林兼國
史院職修國史典制誥備顧問辛丑命阿朮分兵取揚州
有二星闕於中天一星隕夏四月壬寅朔改西夏中興道
按察司爲隴右河西道丙午阿里海牙軍至江陵宋荆湖

宣撫朱禩孫制置使高達知荆門軍劉懋湖北提刑青陽
夢炎李湜俱出降遂入江陵分道招諭未下州郡峽歸澧
等州常德府新舊城各守臣以次歸順辛酉宋郢復二州
安撫趙孟翟貴五郡鎮撫呂文福竝以城降癸亥阿朮駐
師瓜洲宋兵盡焚廬舍遷其民以去丙寅立尙牧監免京
畿西京陝西今歲絲銀丁卯命李羅爲御史大夫罷隨路
巡行勸農官以按察司兼勸農事增副使僉事二員庚午
師克沙市屠其城宋都統孟玘監鎮司馬夢求死之五月
辛未朔阿里海牙還鄂州以廉希憲行省江陵庚辰遣高
達安撫湖南帝曰昔我國家出征所獲城邑卽委而去之
未嘗留兵戍守以故連年征伐不息夫爭國家者取其土
地人民而已得地無民其誰與居今務保守城邑使百姓

安居力農湖南州郡皆汝舊部曲未歸者作何招懷新附者作何安集汝必熟知其事聽汝爲之辛巳宋辰隨均沅靖房六州守臣皆降荆南湖北平得府三州十一軍四縣五十七丁亥召伯顏赴闕壬辰宋統制劉師勇殿帥張彥王安節據常州推姚訔爲守六月庚子朔日食旣晝晦如夜星見雞鶩皆歸宋嘉定安撫魯萬壽以城降賜名順命僉四川行院事戊午招諭宋四川制置使趙定應曰比者青陽夢炎赴闕面陳蜀省事宜奏請緩師令自納款姑從所請今遣招討使畢再興宣布大信若能順時達變可保富貴無爲塗炭生靈自貽後悔辛酉宋潼川安撫梅應春來降戊辰罷山東經略司秋七月庚午朔阿朮集行省諸翼萬戶兵船於瓜洲阿塔海董文炳集行院諸翼萬戶於

西津渡宋沿江制置使趙潛樞密都承旨張世傑知泰州
孫虎臣陳舟師於焦山南北阿朮分遣水軍萬戶劉琛循
江南岸東趨夾灘繞出敵後文炳直抵焦山南麓以倚其
右招討使劉國傑趨其左萬戶忽刺出擣其中堅張弘範
自上流趨焦山北大戰乘風縱火焚其舟宋師大敗世傑
虎臣走追至圖山獲黃鵠白鶴船數百艘宋自此不能軍
癸酉太白犯井癸未分命伯顏趨臨安阿里海牙取湖南
阿朮攻淮南萬戶宋都帶李恆尙書呂師夔等取江西罷
淮西行院以阿塔海董文炳同署省事辛卯太陰犯畢甲
午進伯顏右丞相阿朮左丞相詔僉雲南落落蒲納烘等
砦軍萬人取察罕章未附種落增置燕南河北道提刑按
察司八月癸卯伯顏陛辭帝曰若宋君臣相率來附則趙

氏族屬可保無虞宗廟悉許如故可持詔往諭己未升任
城縣爲濟州九月己巳太白犯少民庚午從阿合馬請以
軍興國用不足復立都轉運司九諸路轉運司十一濫增
課程己卯太白犯太微西垣上將乙酉罷襄陽統軍司丙
申命玉昔爲御史大夫括江南諸郡書版及臨安祕書省
乾坤寶典諸書冬十月戊戌朔享太廟牲仍用牛癸丑太
陰犯畢十一月丁卯阿里海牙圍潭州乙亥伯顏分兵三
道趨臨安阿剌罕率步騎自建康四安廣德出獨松關董
文炳率舟師循海由澈浦至浙江伯顏與阿塔海居中節
度諸軍期竝會臨安己卯宋都帶次龍興宋轉運判官劉
槃降都統密佑不屈死江西諸郡相繼歸附得府州六軍
四縣五十六壬午伯顏屠常州宋守臣姚訔陳炤王安節

皆死之劉師勇奔平江改順天爲保定府乙酉阿剌罕克
廣德知軍令狐槃降丙戌太陰犯軒轅大星庚寅伯顏遣
降人游介寶奉璽書副本至宋十二月戊戌填星犯亢辛
丑董文炳次許浦宋都統祁安以本軍降甲辰伯顏次平
江宋都統王邦傑知府潛說友通判王矩之迎降丁未改
諸站提領司爲通政院整飾諸譯戌申太陰犯畢宋主遣
右史陸秀夫奉書尊帝爲伯父世守子姪禮請和伯顏不
許丙寅阿剌罕次安吉宋安撫趙與可以州降置四川馬
湖路省重慶路隆化縣入南川瀘州海山縣入昌黎復置
華州鄭縣蘄州平谷縣是月祀天始用香酒脯鬻行一獻
禮用呂文煥言始榷江西茶是歲天下戶四百七十六萬
四千七十七

十三年丙子春正月丁卯朔阿里海牙克潭州宋安撫李芾知衡州尹穀闔室自焚死轉運使鍾蜚英都統陳義自殺參議楊霆赴水死湖南平得府一州六軍二縣四十伯顏次嘉興宋安撫劉漢傑出降董文炳至乍浦宋統制劉英以本軍降辛未文炳至海鹽守臣王與賢胡全沈世隆皆降壬申立回易庫於諸路掌市易幣帛諸物辛巳伯顏次崇德宋相陳宐中遣侍郎劉廷瑞等來返且約面議降事甲申伯顏至皋亭山董文炳阿剌罕以兵來會宐中違約不至宋主遣使齎傳國璽及降表詣軍前其辭曰大宋國主累謹奉表於大元仁明神武皇帝陛下累眇焉幼冲遭家多難權奸賈似道背盟誤國至勤興師問罪累非不欲遷避以求苟全自知天命有歸避將焉往惟是世傳鎮

寶不敢愛惜謹奉太皇太后命戒痛自貶損削去帝號以
兩浙福建江東西湖南二廣四川見存州郡悉上聖朝爲
宗社生靈所哀請命伏望聖慈矜全不忍累三百年宗社
遽至殞絕令趙氏子孫世世有賴不敢弭忘伯顏以其表
不稱臣仍書宋號不受乙酉師次臨安北十五里宋陳宐
中張世傑劉師勇等挾益廣二王出嘉會門渡浙江遁去
輟耕錄云伯顏駐軍皋亭山遣千戶囊加台等入城慰諭
令居民門首各貼好投拜三字及聞益王廣王如婺州即
命分兵屯守諸門時范文虎安營江澣太皇太后望祝曰
海若有靈當使波濤大作一洗而空之無何潮汐三日不
至軍馬
宴然 丙戌宋主昀稱臣降表至己丑遣千戶囊加帶齎
璽北上二月丁酉日中有黑子相盪如鵝卵庚子宋主昀
率文武官詣祥曦殿望闕上表乞爲藩臣遣賈餘慶謝堂
家鉉翁劉岳等充祈請使詣闕待命且命文天祥同行伯

顏承制以臨安爲大都督府命忙古帶范文虎入視事兩浙平得府八州六軍一縣八十一辛丑師克臨江軍宋知軍陳元死之丁未慰諭臨安官吏軍民詔曰間者丞相伯顏上奏宋母后幼主暨諸大臣百官已於正月十八日齋璽綬奉表降附朕惟自古降王必有入覲之禮已遣使特往迎致爾等各守職業勿復妄生疑畏凡歸附以前犯罪悉從原免公私逋欠不得徵理一應抗拒王師及逃亡嘯聚者竝赦其罪百官有司諸王邸第三學寺監祕省史館及禁衛諸司各宜安居州郡官吏勿得依殘宋故事擅自科斂所有山林河泊薪木花果魚蝦菱芡諸物聽民采取權免徵稅太常寺祭器樂具法服樂工鹵簿儀衛宗正譜牒天文地理圖書及典故文字戶口版籍盡數收取前代

聖賢之後及高尚儒醫僧道卜筮通曉麻數竝山林隱逸
名士窮居不能自達者所在官司具以名聞山大川寺
廟或歷代名人遺蹟不許侵毀鰥寡孤獨不能自存者量
加贍給且命伯顏入宋宮收衮冕圭璧符璽及宮中寶玩
車輅輦乘麾仗等物戊午宋制置使夏貴以淮西降得府
二州六軍四縣三十四三月戊辰禁江南及西番僧持軍
器甲戌宋宗長福王與芮來軍中文天祥自鎮江入真
州乙亥伯顏發臨安北還畱忙兀台鎮浙西峻都鎮浙東
董文炳阿剌罕經略浙閩丁丑阿剌罕等入宋宮宣詔趨
宋主入覲宣讀至免繫頸牽羊之語宋太后全氏泣謂宋
主曰荷天子聖慈活汝當望闕拜謝拜畢子母肩輿出宮
唯太皇太后謝氏以疾暫畱戊寅立淮西廬州總管萬戶

府乙酉吉袁贛南安四郡來歸閏月丙申置宣慰司於濟
寧路主印造交鈔供江南軍儲立尙珍署收掌濟寧諸處
子粒供酒材汪惟正略地涪州克山寨谿洞二十三所甲
子以郝禎參知政事夏四月乙丑朔省東川行樞密院及
成都經略司入西川行院己卯以待衛親軍征戍久放令
還家期以六月各赴軍五月乙未朔宋主焘至上都降封
瀛國公命宰相出通州迎黃羅張輓先燕三宮於會同館
焘後十次開筵月支糧萬石日支食肉六十斤
以平宋遣官告天地祖宗於上都之近郊宋益王昞稱帝
於福州癸卯復沂莒膠密寧海五州所括防城軍爲民免
其租徭二年己巳阿朮遣兵攻拔秦州之新城丁未宋揚
州都統姜才攻灣頭堡親軍千戶董士元戰死戊申改博
州爲東昌路升閩州爲保寧府六月甲子朔以孔子五十

三世孫曲阜縣尹孔治兼權主祀事己巳置行戶部於大
石造交鈔通江南貿易宋江西制置黃萬石以其軍來降
辛未命阿里海牙征廣西罷兩浙大都督府建行尚書省
於鄂州臨安壬申設諸路宣慰司以行省官爲之竝帶相
銜其已立行省者不更設宣慰司甲戌命贊善王恂都水
少監郭守敬更造新麻復召許衡赴京商訂戊寅詔作平
金平宋錄及諸國臣服傳記壬辰宋淮東制置使李庭芝
畱安撫朱煥守揚州與姜才率步騎東走泰州阿朮分道
追及圍之秋七月乙巳朱煥以揚州降乙卯宋泰州守將
孫良臣獻城李庭芝姜才被執不屈斬之師入眞州宋守
將苗再成死之通滁高郵諸州相繼來附淮東平得州十
六縣三十三八月己巳救漢軍都元帥李庭將侍衛軍征

河西庚辰以銅爵一豆二獻於太廟敕常饌外益以野豕鹿羊蒲萄酒宋太皇太后謝氏至燕降封壽春郡夫人九月壬辰朔改作太廟金主太祖主題曰成吉思皇帝睿宗主題曰太上皇耶可那顏皇后皆題名氏癸卯以平宋大赦天下丙午敕常德府歲貢包茅丁未墮沿淮及襄漢荆湖諸城甲寅太白入南斗乙卯升吐蕃哈答城爲寧遠府辛酉阿朮入覲奏得江淮及浙東西湖南北府三十七州一百二十八關一監一縣七百三十三冬十月戊子諸軍分道取閩廣命阿剌罕董文炳忙兀台梭都以州師出明州塔出呂師夔李恆以騎兵出江西十一月戊申阿剌罕克處州宋秀王與樺觀察使李世達監軍趙由瑒察訪使林溫被執皆不屈死旋破建寧府邵武軍壬子賜龍荅溫

軍有功者鈔帛宋主昫航海趨潮州癸丑阿剌罕軍至福

州宋招捕使王積翁爲內應府尹王剛中迎降乙卯太陰

犯填星敕管民官及理財官由中書省銓調軍官由樞密

院定擬十二月辛酉朔熒惑掩鉤鈴丁卯改雲南蘿蔔甸

爲元江府路

旗志作蘿盤

戊辰宋提舉市舶使蒲壽庚以泉州

降遂徇興化軍宋知軍陳文龍被械死宋主昫次惠州甲

子門遣倪宙奉表詣軍前請降壬申有告運使姜毅所言

多不軌指毅妻子爲證帝曰妻子豈爲證者邪置弗問庚

寅詔諭新附府州軍縣官吏軍民曰昔以萬戶千戶漁奪

其民致令逃散今悉以人民歸元籍州縣凡管軍將校及

宋官吏向有以勢奪民田廬者俾各還本主無主則以給

附近民之無產者其田租商稅茶鹽酒醋金銀鐵冶竹貨

湖泊課程從實辦納故宋繁冗科差如聖節上供經總制錢等百有餘條悉與除豁改瑞安府爲溫州隴州爲散府薊州復置豐潤縣升潮陰縣爲潮州臨洮渭源堡爲縣分立東西二川行樞密院以合丹闊里吉思領東院攻合州不花李德輝領西院攻重慶阿里海牙破靜江宋守帥馬暨黃文政張虎提刑鄧德遇俱死之廣西州郡皆下是歲東平濟南泰安德州安東海州清河平灤西京等州皆水旱缺食振軍民站戶米二十二萬五千五百六十石粟四萬七千七百十二石鈔四千二百八十二錠有奇天下戶一千五百七十八萬八千九百四十一

十四年丁丑春正月癸巳進軍廣東宋循梅二州守臣劉興錢榮之迎降新會令會逢龍東莞義民熊飛戰死丙申

以江南平百姓疲於軍供免今歲絲銀召天師三十六代
孫張宗演至京賜號演道靈應沖和真人還江南領諸路
道教置江淮都轉運鹽司及榷茶轉運司丙辰阿剌罕破
汀關宋汀守黃去疾監軍吳浚竝降二月癸亥彗星出東
北長四尺餘宋瑞州安撫姚文龍張文顯來降其家屬爲
宋所害各賜鈔優之壬午墮江西諸城惟隆興濱江仍舊
丁亥宋知南恩州陳堯道僉判林叔虎涪州陽立各以城
降命李羅爲樞密副使兼宣徽使領侍儀司事遣吳浚至
漳州說文天祥天祥斬之三月辛卯以廣西二十四郡歸
附復建行省於潭州置廣南西路宣撫司於靜江癸巳敕
行都水監兼領漕運乙未宋建寧漳泉等郡守臣邸德傅
李珣郭贊李公度皆以城降壬寅克廣東肇慶府新封等

州乙巳命中外官所佩金銀符用色組繫於肩腋以免褻
瀆著爲令庚戌四川南平軍都掌蠻羅計蠻及鳳皇中壠
羅韋高厓四砦與播州土官楊邦憲思州土官田景賢相
繼送款癸丑命汪惟正自東川移鎮鞏昌廣南西路慶遠
鬱林昭賀藤梧融賓柳象邕廉容貴潯悉平得府一州十
四復設襄陽南漳二縣升崇明沙爲州夏四月甲子宋特
磨道將軍農士貴安平州李惟屏來安州岑從毅以所屬
溪洞百四十七來附癸酉省各路轉運司入總管府設鹽
轉運司四置榷場於碣門黎州與吐蕃貿易丙戌禁江南
行用銅錢五月癸巳京畿不雨嚴酒禁犯者籍其家癸卯
立廣西欽橫二州安撫司敕江淮新附官三品以上各遣
質子一人入侍西番長阿立丁寧占等三十一族來附辛

亥河南山東饑弛河泊禁乙卯選蒙古漢軍相參宿衛秋
七月戊子朔罷大名濟寧印鈔局丁酉敕自今非佩符使
臣及軍情急速不聽乘傳癸卯諸王昔里吉劫北平王南
木合囚丞相安童脅諸王以叛使通好海都海都不納遂
率西道兵至和林城北帝命伯顏往擊大破之諸王忽魯
帶率其屬來歸與伯顏軍合乙巳宋張世傑復入邵武軍
丙午初立行御史臺於揚州統淮東淮西湖北浙東浙西
江東江西湖南八道每道各增置提刑按察司仍總居內
臺令彈劾行省宣慰管軍管屯諸色官吏非違命相威爲
御史大夫設行臺監察御史立行中書省於江西以塔出
爲右丞呂文煥爲左丞張榮實李恆耶的迷失程鵬飛蒲
壽庚竝參知政事帥師定閩廣壬子權大都商稅八月戊

午朔新建太廟於大都李恆自將攻文天祥於興國天祥走至空坑得脫裨將鞏信力戰死招討使趙時賞被禽九月丙申廣南東路廣連韶德慶惠潮南雄英德等郡皆平戊申耶的迷失復破邵武軍入福州宋主昰次廣州之淺灣詔塔出與李恆呂師夔以步卒出大庾嶺忙兀帶梭都蒲壽庚及元帥劉深等以舟師下海合追宋二王冬十月丙辰朔日食甲申塔海略地至夔府毀其城梭都破興化軍獲守帥陳瓚車裂之屠其民十一月戊子文天祥與其徒趙孟潛復起兵行省發兵攻之孟潛被殺天祥僅以身免執其妻子赴京師乙未定偽造寶鈔同情者竝死改稱宋曰亡宋行在曰杭州劉深攻宋主昰於淺灣張世傑退保秀山十二月丁卯以大都物價翔踊發官廩萬石振糶

貧民庚午梁山軍袁世安以其城及金石城軍民來降乙亥導任河復民田二千餘頃以耿仁參知政事是歲振東平濟南等郡饑民米三萬一千餘石粟二萬八千石鈔萬有百錠

十五年戊寅春正月辛卯遣阿老瓦丁將兵戍幹端城已

亥禁軍民略賣良家子女賜湖州長興縣金沙泉名瑞應

泉唐時用此水造紫筍茶進貢有司具牲幣祭之始得水事訖輒涸宋未屢加浚治泉迄不出至是中書省遣官致祭一夕水溢可溉

田千畝因賜今名丙午萬戶圖滿荅爾克瀘州宋安撫

王世昌死之戊申降封宋福王趙與芮平原郡公庚戌東

川副都元帥張德潤大敗涪州兵州將王明及其子忠訓

總管韓文廣張遇春皆死之二月西川行院不花圍重慶

宋守將張玘屢敗所部開門納降玘潛遁至涪元帥張德

潤邀禽之明年珙行至安西自經死

此事據宋史書之元舊史誤書於前一年

且誣珙出降與元史汪良臣及紐璘傳亦不合且舊本紀於上年禽珙之後七月始書張德潤破涪八月始書詔不花行院西川亦前戊午祀先農令蒙古胄子代耕籍田癸

後慎例種種不合亥升華亭縣爲松江府復立河中府萬泉縣辛未以蜀地

多嵐瘴弛酒禁丁丑熒惑犯天街壬午梭都攻潮州屠其

民知州馬發死之置太史院掌天文麻法以祭酒許衡兼

領三月乙酉命忙兀帶梭都蒲壽庚行省福州鎮撫瀕海

諸郡合刺帶爲沿海經略使帥舟師南征丁亥太陰犯太

白戊子犯熒惑甲午西川行院招降重慶等處得府三州

六軍一監一縣二十柵四十蠻夷司一竝招宥勝土恢等

城及石樞寨相繼來降壬寅詔諸路歲比不登免今年田

租絲銀乙巳楊文安克咸瀆紹慶二州斬郡守鮮龍廣南

宣慰使招降雷化高三州宋主昞奔化州之礪洲尋歿廣
王昺嗣立夏四月乙卯敕修會川縣盤古氏祠以時雨霑
足弛酒禁民衰疾者官爲醞釀量給之戊午以江南土寇
竊發遣官分道撫治檢覈錢穀察郡縣災傷吏廉能者舉
以聞其貪殘不勝任者劾罷丁丑雲南行省招降臨安白
衣和泥分地城寨百有九所威楚金齒落落分地城寨軍
民三萬二千二百戶禿老蠻高州筠連州等城寨十九所
壬午立行中書省於建康敕自今罷免之官宰執爲宣慰
宣慰爲路官路官爲州官以淮浙鹽課直隸行省宣慰官
勿預改北京行省爲宣慰司五月癸未朔定武官承襲制
凡主兵官有功升秩者其原職不得令子孫復任惟陣亡
者始得襲本職病故者授官降一等總把百戶老死者不

襲具爲令甲午敕諸職官犯罪受宣者聞奏受敕者從行臺處治受省劄者按察使處治其宣慰司案牘聽本道按察使磨刷一應罪犯有司勘明俟按察使審覆依例彙奏自行省以下公務小事七日中事十五日大事三十日爲限乙未改烏蒙路隸雲南六月乙卯升西番李唐城爲州濟南府爲路降西涼府爲州宋主鬲徙居新會之厓山丁卯置甘州和羅提舉司以備軍餉振貧民甲戌汰江南冗官淮西宣慰使昂吉爾入覲言阿合馬所立江西樵茶運司及諸路轉運提舉等官多至五百餘人帝顧謂左右曰江南官吏太冗省臣姚樞輩知而不言昂吉爾乃爲朕言之近侍因奏阿里海牙屬吏張鼎其人亦參政矣帝卽命罷斥傳旨省院臺及翰林院今爲行省宣慰及各路達魯

花赤佩金虎符者多謬濫可大加裁汰於是以龍興省并
入福建仍削各官所帶相銜罷榷茶營田司歸本道宣慰
司漕運司歸行省各路總管府計戶數多寡分上中下三
等設官改江南總管府爲散府者七爲州者一散府爲州
者二乙亥敕諸司奏事必登起居注戊寅全州西延溪洞
徭蠻二十所內附己卯命張弘範爲蒙古漢軍都元帥李
恆副之由海道討宋餘眾秋七月壬午朔宋湖南制置張
烈良提刑劉應龍起兵應厓山阿里海牙追襲之二人皆
戰死甲申增行臺監察御史四員江南湖北道嶺南廣西
道福建廣東道竝設提刑按察司改京兆府爲安西府大
倉爲御廩資成庫爲尙用監并皮貨局入總管府丙申復
建行省於贛州轄福建江西廣東諸道八月壬子朔追毀

宋故官所受告身壬戌漳州安撫使沈世隆守建寧降人郭贊持張世傑偽檄至世隆執斬之行省謂世隆擅殺籍其家帝曰世隆何罪命還其貲仍授本路管民總管甲戌以川蜀山寨搖洞既平其渠州禮義等城仍畱兵鎮守餘悉徹毀己卯立提刑按察司於畏吾兒分地辛巳升洛磁爲廣平府諭行省梭都蒲壽庚曰東南島嶼諸國尙有慕義之心可因番舶諸人宣布德意誠能來朝朕將寵禮之其往來互市俾各從所願九月壬午朔省東西川二行院其成都潼川重慶利州設四宣慰司戊子分揀諸路所括軍爲民冬十月己巳張弘範統舟師由海道襲漳潮惠三州李恆時將步騎由梅嶺襲廣州廣南諸郡相繼復爲宋陷庚午徙河南北道按察司治南京十一月丁亥以辰沅

靖鎮遠等郡蠻獠接壤民不安業命塔海程鵬飛竝爲別
湖北道宣慰使置司常德路壬辰阿里海牙略地至夔州
宋安撫使趙與珞冉安國黃之傑皆死之己亥定己除官
不之任者竝削籍辛丑建寧人黃華集鹽夫及畚民爲亂
丁未移浙江行省治杭州立淮東宣慰司於揚州閏月庚
戌朔羅施鬼國王阿榨內附立羅甸軍民安撫司辛亥太
白熒惑填星聚於房甲寅置光祿寺領尙飲尙醞等局癸
亥李恆入廣州張弘範攻漳州得山寨百五十戶百萬十
二月己丑授西南番阿永都掌蠻得蘭紐竝安撫使丙申
從播州安撫楊邦憲請以鼎山縣仍隸播州尋改播川縣
壬寅張弘範屯潮陽文天祥走五坡嶺遣前鋒張弘正追
執之送大都丙午禁玉泉山樵采漁弋戊申追封伯夷昭

元史卷五

本紀

罕

義清惠公叔齊崇讓仁惠公加封程顥豫國公程頤洛國公置屯田總管府於開成路復臨淄臨朐清河爲縣導肥河入於鄆淤陂盡爲良田會諸王於大都分賜宋寶玉器幣